

# YANGI O'ZBEKISTON

Ijtimoiy-siyosiy gazeta

№ 76 (1137), 2024-yil 20-aprel, shanba



www.yuz.uz



yuz.uznews



yuz\_official



yuz.uz\_news



yuz



## OLY DARAJADAGI O'ZARO ISHONCH VA QO'LLAB-QUVVATLASH RUHIDAGI FAOL MULOQOTLAR DO'STONA MUNOSABATLARNI YANADA KENGAYTIRADI

O'zbekiston Respublikasi Prezidenti Shavkat Mirziyoyev Tojikiston Respublikasi Prezidenti Emomali Rahmonning taklifiga binoan 18-19-aprel kunlari davlat tashrifi bilan ushbu mamlakatda bo'ldi.



Tashrifning birinchi kuni o'tkazilgan mukozaralarda ikki do'st mamlakat xalqlari manfaatiga xizmat qiladigan ko'plab kelishuvlarga erishildi. Xususan, davlat rahbarlari ikki tomonlama munosabatlarda yangi tarixiy bosqichni boshlab bergan Ittifoqchilik munosabatlari to'g'risidagi shartnomani imzoladilar.

O'zbekiston Respublikasi Prezidenti Shavkat Mirziyoyevning Tojikistonga davlat tashrifining ikkinchi kuni ushbu mamlakat Oliy Majlisi Namoyandagon majlisi Raisi Mahmadoir Zokirzoda bilan uchrashuv bilan boshlandi.

Uchrashuvda O'zbekiston bilan Tojikiston o'rtasidagi ko'p qirrali strategik sheriklik va ittifoqchilik munosabatlarida bugun yuksak darajaga erishilgani mamnuniyat bilan qayd etildi.

Parlamentlararo almashinuvni yanada faollashtirish, kooperatsiya loyihalari va madaniy-gumanitar dasturlarni qo'llab-quvvatlash va ilgari surish uchun sohaviy qo'mitalar va hududiy kengashlar darajasida samarali aloqalarni kengaytirish masalalari muhokama qilindi.

Qabul qilingan hujjatlar xatlovdan o'tkazish hamda oliy darajadagi kelishuvlarning o'z vaqtida ro'yobga chiqarilishi ustidan parlament nazoratini amalga oshirishda ikki mamlakat deputatlarining muhim roli qayd etildi.

Shundan so'ng O'zbekiston Respublikasi Prezidenti Shavkat Mirziyoyev Tojikiston Respublikasi Bosh vaziri Qohir Rasulzodani qabul qildi.

O'zbekiston — Tojikiston strategik sheriklik va ittifoqchilik munosabatlarini

yanada kengaytirish masalalari muhokama qilindi.

Davlatimiz rahbari kuni kecha Ittifoqchilik munosabatlari to'g'risida tarixiy shartnoma imzolanganini ta'kidladi. Shu ma'noda, oliy darajada erishilgan barcha kelishuvlar ikki mamlakat hukumatlari tomonidan so'zsiz amalga oshirilishi muhim ekanini qayd etildi.

Shu maqsadda qo'shma "yo'l xaritasi"ni ishlab chiqish va Bosh vazirlarning uchrashuvlarini tizimli ravishda tashkil etib borish zarur.

Tovar ayirboshlashni oshirish, chegaroldi savdoni va savdo infratuzilmasini rivojlantirish, avtomobilsozlik, energetika, elektrotexnika, qazib chiqarish, to'qimachilik, farmatsevtika, qishloq xo'jaligi va boshqa tarmoqlarda sanoat

kooperatsiyasini chuqurlashtirish ustuvor vazifalar sifatida ko'rsatib o'tildi.

Ikki mamlakat hududlarining salohiyatidan to'liq foydalanish hamda madaniy-gumanitar almashinuvni kengaytirish muhimligi alohida ta'kidlandi.

O'zbekiston Prezidentining Tojikistonga davlat tashrifi doirasida mamlakatimizning Dushanbe shahridagi elchixonasi yangi binosining tantanali ochilish marosimi bo'lib o'tdi.

Davlat rahbarlari ramziy tasmani kesib, O'zbekiston diplomatik vakolatxonasi binosini ochib berdilar. Ikki mamlakat davlat madhiyalari yangradi.

Prezidentlar elchixonada binosida diplomatlar uchun yaratilgan sharoitlar bilan tanishdilar.

Elchixonada mamlakatlarimiz o'rtasidagi ko'p qirrali strategik sheriklik va ittifoqchilik munosabatlarini yanada rivojlantirishga qaratilgan ishlarni samarali tashkil etish uchun barcha sharoitlar yaratilgan.

Shavkat Mirziyoyev va Emomali Rahmon elchixonada Faxriy mehmonlar kitobiga o'z tilaklarini yozib qoldirdilar.

So'ng O'zbekiston Prezidenti Shavkat Mirziyoyev Tojikiston Prezidenti Emomali Rahmon bilan birgalikda Dushanbedagi Ekspomarkazida tashkil etilgan O'zbekiston sanoat ko'rgazmasiga tashrif buyurdi.

Yetakchilar "Made in Uzbekistan" brendi ostida tashkil etilgan pavilyon bilan tanishdilar. Unda mamlakatimiz avtomobilsozligining yuqori texnologik mahsulotlari, elektr

va qishloq xo'jaligi texnikasi, tayyor oziq-ovqat mahsulotlari, kimyo, to'qimachilik, farmatsevtika va boshqa sanoat tarmoqlarining tovarlari namoyish etilgan.

Davlat rahbarlari yetakchi korxonalar kooperatsiyasini kengaytirish, o'zaro tajriba va texnologiyalar bilan almashish zarurligini ta'kidladilar.

Shu bilan O'zbekiston Prezidenti Shavkat Mirziyoyevning Tojikiston Respublikasiga davlat tashrifi yakuniga yetdi. Dushanbe xalqaro aeroportida davlatimiz rahbarini Prezident Emomali Rahmon kuzatib qo'ydi.

O'ZA

O'zbekiston Respublikasi Prezidenti Matbuot xizmati suratlari.

### Biz va dunyo

## KO'P TOMONLAMA HAMKORLIKNI SIFAT JIHATIDAN YANGI BOSQICHGA OLIB CHIQUADIGAN ALOQALAR

### O'ZBEKISTON — TOJIKISTON SAMMITI XORIJIY EKSPERTLAR DIQQAT MARKAZIDA

O'zbekiston Prezidenti Shavkat Mirziyoyev 18-19-aprel kunlari davlat tashrifi bilan Tojikistonda bo'ldi. Tashrif natijalari uning muvaffaqiyati va samaradorligini ko'rsatdi.

Xorijiy ekspertlarning aytishicha, ikki tomonlama munosabatlarning yuqori darajaga ko'tarilishiga O'zbekistonning Markaziy Osiyoda yaxshi qo'shnihilik, o'zaro manfaatli hamkorlikni mustahkamlash, umumiy salohiyatni yuksaltirish va barqaror taraqqiyotni ta'minlash borasidagi sa'y-harakatlari natijasida erishildi.

Davomi 2-betda



### Bugunning gapi

## ENERGIYA TARIFIDAGI O'ZGARISHLAR

yoxud arzon sho'rva nega tatimaydi?

2

### DAXLDORLIK TUYG'USI

## MA'NAVIY BIRLASHUV

mag'lub bo'lmas jamiyatni barpo etadi

Inson o'zining fikrlash qobiliyati, ma'naviy dunyosi bilan tirik. U ma'naviy jihatdan yetuk bo'lsagina, haqiqiy inson bo'la oladi. Ma'naviyat — kishini qahramonlikka, ezgulikka yetaklaydi, kamolotga yetkazadi, fikrini teranlashtiradi, o'zligini, o'zining qadrigimmatini anglashni o'rgatadi.

Ma'naviyat chetga surib qo'yilsa, yoshlar to'g'ri yo'ldan adashadi, hoyu havasga beriladi, bema'ni urf-odatlarini o'ylab topadi. Ilim-ma'rif va yuksak ma'naviyat yo'q joyda baxt-saodat bo'lmaydi! Shuning uchun nafaqat yoshlar, balki butun jamiyatimiz a'zolarining bilimi, saviyasini oshirish uchun, avvalo, ilm-ma'rif, yuksak ma'naviyat kerak. U odamlarning har bir xatti-harakati, fikrlash tarzi, o'y-xayollari so'zga aylanganida namoyon bo'ladi.

Dunyoda halol, yuragi toza, qalbi pok, ma'naviyat boy odamlar ko'p. Ularning ezgu ishlari tufayli bu yorug' olamda ma'naviyat hamisha barqaror bo'lib kelgan. Chunki vijdoni uyg'oq, el-yurt tashvishi bilan yashaydigan kishilar yon-atrofida bo'layotgan voqealarga, yordam

va ko'makka muhtoj insonlarning muammolariga, adolatning toptalishiga befarq qarab turmaydi.

Qaysi eldan, qaysi yurtidan o'z manfaatini hamma narsadan ustun qo'yadigan insonlar chiqsa, ko'paysa, u yerda o'zgarish ham, yuksalish ham bo'lmasligi ayon. Shu bois, har qaysi xalq yoki millatning ma'naviyatini uning tarixi, o'ziga xos urf-odat va an'analari, hayotiy qadriyatlaridan ayri tasavvur etish qiyin.

Ma'naviy meros, madaniy boyliklar, ko'hna tarixiy yodgorliklar esa inson ongini ma'naviy oziqlantiradi. Agar shu ozuqani o'zi yashayotgan muhitdan olmasa yoki bu muhit uni qoniqtirmasa, bunday oziqni u boshqa joydan izlaydi.

Davomi 3-betda









